

王強 主編

近代世界史文獻叢編

34



廣陵書社

近代世界史文獻叢編
34



廣陵書社

貴州师范学院内部使用

第三十四册

重訂法國志略 (二) 王韜輯撰 清光緒十六年 松隱廬刊

.....

重訂
國志
法略

貴州師範學院內部使用

光緒庚寅仲
春沐隱廬

重訂法國志略卷十二

長洲王 韜紫詮甫輯

法英婚盟和戰紀下

一千六百四十四年英有內亂上院議士叛王王將敗英盾携女顯略奔法明年英世子亦遁於法京巴黎斯依其母以居英王有二女一嫁荷蘭一尙幼同往法依焉英王卒爲上院議士所弑嗣王查爾斯第二舉兵討罪一戰而殲從者星散嗣王易服而逸遁至海濱遇煤船求載乃得抵法千六百五十三年英人格朗空主攝國政時法國方與西班牙構兵遣使聘於英意欲藉英爲援助也法國大臣麥薩林議與英和其誓書云曠格係法之北方海口爲西班牙人所踞英師取之歸於法英之嗣王在法境內者爲英逐之時又有福德窪民爲加特力人所困法當助之格朗空從之與法人和以精兵六千四方征伐滅西

人之商於荷蘭者戰於騰格勝之掌其鏘功名赫然列國震恐
既沒歐洲名士作詩以頌美其功謂英之格朗它猶法之拿破
崙古來起匹夫而擅帝王之權者此二人而已格朗它既沒之
後七月國人始召英嗣王於法而立之是爲查爾斯第二千六
百六十四年英以國賦不足於用乃遣使告法王路易十四願
以前所得騰格地鬻於法法王欲其國土開拓毘連及比利時
獲此大悅因以重價酬英後人定論英屬地之在法境者事勢
本不宜有蓋以誅王之意而深惡之也一千六百六十八年法
王路易十四奪比利時發蘭德部駸駸有吞併之勢於是英吉
利荷蘭瑞典三國合盟欲平其難命反侵地俄而英王先自攜
貳卒不果轉聽其弟約克言共思興加特力教於國中與法王
盟潛約數事言一俟機會之來卽自明爲加特力人與法併力
以滅波羅特士教之荷蘭人以兵船助法所有軍士餉糈由法

王按時厚給國人有不順王旨者法王使人至英助王於是法王每歲輸銀八十萬於英一千六百七十年五月二十二日英及法盟英大臣中惟格利福亞鄰登二人知其謀餘悉不與聞然英王終不敢去波羅特士教法王亦不强之惟英之自謀在交鄰以利國而已此事頗秘迨百餘年有英士至法觀於藏書之所其籌危政教之陰謀始顯法英定盟之後英爲法復侵荷蘭一千六百七十二年三月英與荷人戰甚力荷人退法乘英荷之相持也別由間道出驍騎攻破其國都徧擾四境荷人不得已乃降於英是役也維廉以智退法軍維廉者荷之諸部長也頗有才略先築堤於荷之四境以防川而備敵迨法軍圍攻決堤放水洪波泛濫法之軍士不能駐足始撤圍去無何英人欲弭兵乃與荷平但比勸英王以其弟約克之女馬利歸於荷主阿蘭日部長維廉爲妻英王許之千六百七十七年婚成時

但比爲首輔久握政權力拒加特力教不欲與法人通向聞法之行賄於王故隱忍苟容之然其國人皆不欲法之賂王以與歐洲諸國爲難知但比貪賂因循甚鄙耻之初法人之賂英蓋恐英之合於他國也及聞英荷結婚盟深怨英王遂絕歲幣聲英王之罪并及但比逢君之惡以其約從瑞典荷蘭以拒法王也但比乃與法王約三年中兵革不興當許我歲幣三百萬但比署約他相不與焉但比遂以此得罪未幾約克嗣位與法公使之在英者定盟約法王路易予以三萬金并歲助餉貲以給軍士卑詞以謝往過自是英王事法王維謹一千六百八十八年英人以其王欲興加特力教不洽於衆乃以書至荷蘭召維廉入國維廉聞命卽赴欲親攬英之事權而禦法王之侵凌遂大治舟師法王聞之告英王英王恒擾失措維廉至倫敦軍士莫有禦者英王遂偕其后妃子女奔法英王約克去英歷三月

自法復歸於阿爾蘭軍械火藥芻糧貨一切皆法王所助英
之上院議士大憾欲攻法王并思糾歐洲諸國併力拒之千六
百九十年六月十四日英維廉親征阿爾蘭故王約克禦之後
十七日敗於薄依恩故王居陣後將敗先奔舟行回法國維廉
旣勝諭凡加特力之軍士給還器械旗幟任其所之後爲法王
路易軍士善戰有名薄依恩之戰法之水師敗英與荷蘭之人
於海上英之水師督陰附故王故也法人上岸焚西南一市集
而後去一千六百九十一年英新王維廉回荷蘭與他國公使
合謀拒法於是英與日耳曼荷蘭撒歪西班牙諸國同盟日耳
曼大君名理泊時爲歐洲大國最稱強盛稱號如中國帝王故
推之爲盟主而維廉實主其謀操戰守之柄法王路易貪橫不
道窘逐波羅特教民爲列邦所惡路易欲自爲計先於一千六
百八十八年滅巴拉帶納其地屬日耳曼波羅特士中有名城

悉遭灰燼其意預爲割據一空地作戰場以禦外侮一千六百八十九年諸國始合而攻之至一千六百九十七年兵連禍結盟會益堅法人乃懼而請和千六百九十二年英之舊將校思推奉故王迎其歸國因起兵北方冀他國來援預其謀者英大將馬爾伯羅水師提督拉塞也法王遣其將都爾非助之渡海攻英新王時在荷蘭王后馬利禦之囚馬爾伯羅召水師督戒之曰有告汝有貳心者求禡汝職余弗忍且重任汝汝其勿墜家聲重損國威慰諭遣之於是拉塞力禦敵人潛約法營若黑夜渡海可陽爲不知也者都爾非愎而愚弗聽五月十九日戰於拉合海角英荷兵船合而進攻裨將舵師咸奮力角戰敗法之水師幾盡故王在船目擊此戰雖爲英軍所困不能不嘆其國人之善戰也英兵船往攻法地不勒斯得將焚其船與軍工二廠有先以告從故王之英人其人告於法王得預爲備大敗

英軍或擒或殺者七百人一千六百九十七年列邦合攻法國大小數百戰互有勝負法之財力已殫各國轉輸芻糧糗糒器械甲仗所費亦不貲於是議和罷兵修好同盟於荷蘭之力斯維各國疆域如故法王路易自言願以一維廉爲英之王斯丟亞家自作不靖余不之顧矣然法王言非由衷僅一時取悅於維廉耳蓋英故王約克尙在法境法王無意遠之也其下臣工亦無有諫之者故識者知其後必有軍旅之事且各國和議已成而法王聚兵於國日盛一日西班牙王無子而多病一旦身死法人必思吞噬是則歐洲之難猶未已也西班牙人憂其君之無嗣而國之將分也一法國王一日耳曼大君一巴威略王此三君者皆與西國世有姻婭可以得國英私與法約議三國共分西地其意欲列邦之王無有強弱且不欲法與西兩大國合而爲一也法王路易初意同此後忽中變背約千六百九十

八年分地之約成西西里屬法王西班牙印度比利時屬巴威略密蘭屬日耳曼主第二子查爾斯無何巴威略之子死更立約券以其所應有之地悉歸查爾斯法王路易遣使告於西人言此英王之意西人於是怨英王一千七百年十一月一日西班牙王死法之陰謀始露稱西王遺命腓立爲君腓立者法部安若魯長法之王孫法王棄前約卽遣其孫至西班牙爲王送之曰今而後無比里牛斯山之阻矣言將合爲一家也是年秋各邦復合兵攻法討其兼併西地也英王維廉爲謀主九月十六日英故王約克死於法京法王命其子爲惹迷斯第三將使其繼英王位也

英故王約克第二本名惹迷斯

英人聞之愈怒英王維廉率兵

征法親歷行陣躬當矢石一千七百二年春墜馬傷胸旋死於是英赦馬爾伯羅罪出之獄中用爲大將帥師南行伯羅具有文武材力克當其任五月十五日英倫奧地利荷蘭三國合而

攻西法欲去法王路易之孫爲西王號腓立第五者將以西王之位與奧地利酋長查爾斯議者以爲立君由民此非禮也夏馬爾伯羅會師六萬爲之總帥其始兵來各國軍政難肅主將宏忍寬恕導以良規俾用命而獲勝攻法將波弗勒斯於荷蘭界逐之出境收復芬路路里莽里日三城通謬斯河道乃駐師於荷蘭回英英水師在改的斯將士用命無功而返僅獲西人之運銀船大半自沈於海西印度水師將奔薄與法兵相戰偏將違令死傷甚多一千七百三年葡萄牙王薩歪酋長至英同盟伐法奧地利王子查爾斯自稱西班牙王英將馬爾伯羅新得一城曰邦餘復得數處法兵在南方欲與巴威略約期進師攻日耳曼地至維也納馬爾伯羅謀再出師以救日耳曼之難獨斷於衷不告左右先發兵防戍荷蘭比利時乃渡來尼河通大腦河至巴威略軍行肅然無有勞擾與奧地利合攻法蘭西

巴威略法將大拉德與巴王禦之一千七百四年八月十三日大敗法巴之師生擒大拉德并獲軍校一千二百人千七百六
年五月二十三日英將馬爾伯羅大敗法將味里勞於拉迷里
法之死亡者萬有三千人軍糧八十喪失軍資器械無算法人
於是乎失比利時荷蘭之地凡比律悉安都厄比近的不路日
等大城咸拔幟啟關而迎馬爾之師諸軍壘相繼納欵當是時
法王路易敗而求和列邦之王惡其無信不允所請一千七百
八年春英故王約克子至蘇欲黨之者助其舉事至佛的河英
之兵船在彼風亦不利退還仍回法地七月十一日馬爾伯羅
大敗法將溫多米於窩德那誅擒萬五千人奪獲旗幟百餘有
大軍壘曰來爾防守甚嚴亦大破之特築大路直達法都使英
師從此易入焉一千七百九年九月十二日英將馬爾伯羅大
戰法人於馬巴格法將米拉斯結寨甚固英人雖勝而死傷多

於法人明年法王路易以國衰求和懼英來攻以國界要害多
失於英故也列國之王立欵要約法王心不能甘刊章布告國
人欲百姓助之且將去巴黎斯蓋恐馬爾前往圍攻城下之盟
爲可耻也幸其時英之執政者新且庸闇不更事又英女王安
寵任一女子馬善者惟其言是聽播弄國政汲引匪人哈里者
其戚也薦之晉居首輔於是羣小盈朝皆忌馬爾大勳垂成不
利於己故於英王前力主和議而馬爾出師攻巴黎斯之事遂
不果不然者法亦將危矣一千七百十一年法將味拉斯築堅
壁於法之邊境拒敵之內憂也自謂重關設險人不能犯馬爾
逕率師斬關而入法軍雖衆紛然駭走莫之敢禦英軍遂克其
壘不折一矢法人爲之喪膽是役也英軍銳氣正可用無不願
踴躍從事者而和議之詔遽下蓋英之執政者欲中傷大將訐
其在軍貪黷狀罷其兵權而潛與法王路易定議立約諸將聞

之解體議者以爲自古權臣在內大將未有能立功於外者英於斯時兵非不多也將非不猛也大臣非不賢能也而馬爾伯羅之功烈卒以不就且因讒出此其中蓋有天焉馬爾旣黜英不出一兵列邦亦願議和罷戰一千七百十三年四月十四日英法和約成大旨法與西毋許統於一王惟法王子分封別成一國則可法王肯推女王爲英國王亦許哈諾威家繼爲英王前用兵時所取日巴拉大銘奧格二地竟屬於英許英商掠賣黑奴於西班牙屬土者三十年荷蘭許仍於邊界戍兵防法來侵英法血戰十一年至此始平千七百四十三年英法又有戰事初日主查爾斯第六以其國產予其女馬利亞別理薩爲奧地利女王歐洲諸大國爲之立約蒞盟及查爾斯死法蘭西普魯士巴威略諸王欲背約侵產奧之女王懼求援於英以英王亦立約蒞盟中人也英乃出師一萬六千人救之駐於發蘭德